

24 uras per construir in roboter

(anr/sr) Questa fin da jamna ha la concurrenza naziunala da robotica liug ella Scola cantunala grischuna a Cuera. La concurrenza per scolars dalla scola media – che cuoza 24 uras – vegn organisada dall'uniu Helveticrobot. La finamira da quella ei da motivar giuvenils en Svizra per la robotica. Ils 19 e 20 da schaner 2013 se mesiran rodund 30 teams dall'entira Svizra e construeschan roboters. Duront dus dis survegnan ils participants ella vegliadetgna da 13 tochen 20 onns la pusseivladad da far in'entschatta plascheinva el mund dalla tecnica. En

exact 24 uras san ils participants sviluppar, construir e programmar sezs in roboter. Sco ils organisaturs scrivan en in comunicau da pressa va ei tier quella concurrenza en emprema lingia per saver far experientschas sil sectur dalla robotica. Ils megliers teams survegnan premis.

La Scola politecnica federala (SPF) Turitg metta a disposizion a Helveticrobot ils sortiments da construzion necessaris per saver realisar la concurrenza. Quels «Kits da Lego NXT» vegnian era duvrai per la scolaziun da futurs inschigniers alla SPF Turitg. L'u-

nion Helveticrobot vul etablir ellas scolas medias svizras la robotica sco camp da perscrutaziun. A media vesta dueien ulterius teams puder vegnir motivai da separicipar als campiunatis mundials da robotica. Dil davos campiunadi mundial han sulet duas gruppas svizras priu part. Cun quellas mesiras vul Helveticrobot far enzategi encounter l'actuala munconza d'inschigniers en Svizra.

Aspectaturs ein beinvegni en l'aula dalla Scola cantunala grischuna, Arosastrasse 2, Cuera. A partir da sonda allas 11.00 tochen dumengia allas 14.00.



Ils participants dalla concurrenza da robotica digl onn vargau.



La gruppera da nostalgia ha divertiu il publicum: Maurus Heini, Gieri Blumenthal, Cedric Weller, Yannick Caduff, Lucas Camathias, Romana Brunold ed Anita Hegner (da sen.).

MAD

Buna entschatta dalla Crap Sogn Gion Trophy

(anr/sr) Per schar reviver la tradizion dallas cuoras da skis popularas han la «Renngemeinschaft Alpenarena» e la «Weisse Arena Gruppe Laax» lanciach la sonda targada la Crap Sogn Gion Trophy. Malgrad che beinenqual autra cuorsa ha carmalau sin pista quella sonda las skiuinzas ed ils skiuinz ha la Crap Sogn Gion Trophy – ch'ei adatradra per in e scadin – saviu beneventar biars participants. Rodund 150 carschi ed afons han seschau entusiasmar per quella cuorsa che ha giu liug silla pista da Curnius tochen a Cains sur Falera. Ella categoria nostalgia han siat persunas priu part e procurau cun lur costums ed il stil dils perdavons per attenzion e bia risaglias dil publicum. Il skiuinz il pli spert dalla categoria nostalgia ei Gieri Blumenthal staus, el ei arrivaus a Cains cun in temps da 3:32.123. Bia dapli temps han ils collegas empau pli cumadeiveis duvrau. Duront la cuorsa han els fatig enqual pauza per buca vegnir all'arrivada miez morts dalla stauncladad. Rischli, alias Gigi da Laax, ei arrivaus cun ses skis da lenn cun in temps da varga 13 minutus a Cains e Maurus Heini che ha aunc duvrau empau pli ditg suenter bunamein 18 minutus. Dil meglier temps dil di all'emprema Crap Sogn

Gion Trophy ha Aluis Casut (1:27.567) saviu selegrar, cun pauc disavantatg ein Hampi Casut (1:27.648) e Wendelin Casut (1:28.762) vegni all'arrivada. «La Crap Sogn Gion Trophy ha saviu vegnir lantschada da bellezia aura e buna atmosfera, nus essan cuntents e sch'igl ei pusseivel lein nus cintinuar l'auter onn cun quella cuorsa», ha Martin Candrian, il president dalla «Renngemeinschaft Alpenarena», declarau sin damonda dalla anr. La finamira da quella cuorsa seigi da schar reviver la tradizion dallas cuoras popularas e d'astgar beneventar allas proximas cuoras aunc dapli participants da lunsch e da maneivel. Cun ustria e musica live ei la fiesta vegnida cintinuada la sonda sera en La Fermata a Falera. Per gudignar ils premis ils pli bials han ils participants buca stiuu esser sco emprems all'arrivada, mobein haver il cletg che lur numera vegni tratga sco emprema ord la capiala. Aschia ha Markus Bösch da Laax saviu selegrar dil premi principal, ina vadiala ch'ei vegnida sponsurada dils purs da Falera.

La rangaziun e bia bialas fotografias dalla emprema Crap Sogn Gion Trophy ein d'anflar sut www.rgalpenarena.ch



Theo Candinas duront ina preleczion ord la reediziun da Gion Barlac. Cun quella figura ha igl autur rut tabus e provocau babs e mummas, prers e mistralis.

FOTO S. ROTHMUND

Theo Candinas preleggia a Cuera

(anr/sr) La Chasa Editura Rumantscha e la Biblioteca populara Arcas envidan ad in inscunter cun igl autur Theo Candinas da Surrein. Gievgia, ils 24 da schaner allas 20.00 preleggia Theo Candinas ord la nova reediziun da siu cudisch da cult Gion Barlac. La preleczion vegn moderada da Esther Krättli ed ha liug ella Biblioteca populara Arcas a Cuera. L'entrada ei libra. Ils plazs ein da reservar tier tel. 081 252 61 40. Avon prest 40 onns ein las historias da Gion Barlac digl autur Theo Candinas

cumpardas. Gion Barlac ha duvrau las expressiuns duidas e buca tschintschau entuorn la buglia. El ha rut in tabu suenter l'autur e ladinamein ha il cudisch da scandal procurau per gronda agitaziun en Surselva. La «Gasetta Romontscha» era fullanada cun replicas ed igl autur e siu Gion Barlac fuvan el center dils discours allas meisas rodundas. Dacuort ha la Chasa Editura Rumantscha reediu quei clas-sicher romontsch en ina versiun bilingua scretta e sco cudisch auditiv.



Ils skiuinz sursilvans representan dapi ina jamna en giaccas novas en blau. Gian Marco Menzli da Menzli Sport (davos seniester) ha surdau las giaccas ch'ein plattaforma pils sponsurs digl SST. Davos dretg il president digl SST Ernst Sax e davan el il cautrenader Florian Capaul.

MAD